

Kapiya Sën Pita Kevu Netu Luu Vu Kerisi-yi-alam

1 ¹Yesu Kerisi yi hur los yi sinarë sa Simon Pita. Sa nekevu kapiya sënë yök vu ham sën ham ayomin neya timu vu yi nebë he behil nehevong ving ggëp ti lo. Yesu Kerisi tu hil Anutu, getu hil mehö sën neko hil yom vu yi lo. Yi mehö yohvu om sën vong behil ayod neya timu vu yi. ²Gwëbeng ham raq Anutu luho hil Mehöböp Yesu nij venuh, om luho degevong semusemu nyëmasën nökö böpata jak vu ham, gedevong beham ayomin gëp revuh rot.

Anutu Ggoin Hil Raq Tu Yö Yi Ngaa

³Hil araq Anutu ni in ggoin hil raq in bë hil gaqo niwëek los vunek vunek yaqek-yi natu hil ngaa behil sepa doq yi aggata nivesa. Lob vong ngaa pin sën hil naraq vu in lo vu hil in yi mehö niwëek degwa, om sën hil ayoh vu bë medo nivesa besepa doq aggata niröp mu. ⁴Yönon, ngaa pin sën nedo dob agi og rëk petar na bemala nama na, in mehönon malaj nesepa ngaa nipaya paya mu. Gaq hamek su rëk malamin nama na verök yi nabë saga rë. In Anutu rëk geqo ham vër gegevong yi semusemu böp los nivesa anon sagi vu ham in ham natu yi alam benim in nabë yi. ⁵Ham kwamin bo ngaa saga beham gwevong huk niwëek rot geving. Ham ayomin neya timu vu Yesu om ham gwegin ham begwevong ngaa nivesa vesa geving. Ham gwevong ngaa nivesa, log ham gwevong huk in gaqek pin in ham natök jak degwa mejak ni geving. ⁶Ham natök jak kwamin mejak gaqek degwa ni nabë saga, log ham gwegin ayomin nivesa geving. Ham gwegin ayomin nivesa, log ham najom ham ahon bebare niwëek geving. Ham najom ham ahon mebare niwëek, log ham sepa doq Anutu yi aggata niröp geving. ⁷Ham sepa doq Anutu yi aggata niröp, log ham gwelë Kerisi-yi-alam nivesa geving. Ham gwelë Kerisi-yi-alam nivesa, log ham ahëmin geving mehönon pin geving. ⁸In nabë ham sepa doq ngaa pin sënë begwevong pangsen, og ham su rëk medo meris geham huk anon nama rë. Gaq ngaa sënë rëk gevong beham jak hil Mehöböp Yesu Kerisi yi ngaa pin ni los dahis. ⁹Gaq mehö sën su hen huk nebë

agi neggëp rë lo, og yi nebë mehö mala kenod. Genebë mehö mala raru sën su yoh vu bë gelë ngaa gëp adingnë rë lo. In ggërin demi yom vu gägek sën Anutu ripek yi ngaa nipaya wirek hen ya lo. ¹⁰Om arig lo, Anutu ggooin ham raq ggovek betato ham bë ham natu yi alam, om ham ngo pasanğ gwevonğ huk niwëek in anon jak vu ham. Nabë ham sepa doq ngaa pin sënë, og ham su yoh vu bë rëk bës rë. ¹¹Yönon, nabë ham gwevonğ nabë sënë, og rëk tatekin aggata vu ham, beham doq na hil Mehöböp Yesu Kerisi sën neko hil vër in hil ngaa nipaya nyëvewen lo yi nyëg. Sën rëk gëp degwata los degwata lo. ¹²Sënëk yönon, ham raq ngaa pin sënë ni vorot. Lob ham ko gägek anon sënë raq ggovek ya, lob ham nare niwëek in. Rëk sa bë nanër vu ham gök gökin, in sebër ham kwamin beham kwamin bo gökin. ¹³In sa kwağ nevo bë ngaa sënëk nivesa, om noh vu buk sën sëk nahën nemedo vesag lo, og sëk nanër vu ham gök gökin in sebër ham kwamin. ¹⁴In hil Mehöböp Yesu Kerisi nër rangah vu sa wirek beseraq ni bë yik sa hevongin getur sa vër in navig nyë dus teka. ¹⁵Om sën sa nehevong huk niwëek rot menekevu gägek yök vu ham, in bë nabë sa nadiik, og ham yoh vu bë rëk kwamin bo gägek sënë gökin noh vu buk pin.

He Halë Kerisi Niqapiik Ggovek Ya

¹⁶Gägek sën he nanër agi og he su nanër keriiing tetuhinsën nebë sën mehönon los kwaj yö kwaj nevo medenenër lo rë. Gaq he halë raq malamin bë Mehöböp los bengö yönon. Om sën he nër vu ham ggovek ya beham raq hil Mehöböp Yesu Kerisi niwëek ni, geham raq ni bë rëk nom gökin. ¹⁷Yönon, Ama Anutu tato niwëek los arë böp rangah loq buk sën gägek yam vu niqapiik degwa beko yi raq lo bë, “Sa naluğ sënë, sahëg ving yi pangsen gesa ahëg nivesa rot vu yi.” ¹⁸Alöo nado ving yi ggëp kedu vabuung wirek behango aye sënë yam vu yaqek.

¹⁹Nebë saga, lob he halë bë alam-denenër-gägek-rangahsën hir gägek anon raq. Om bë ham najom hir gägek ahon, og saga mëm nivesa rot. In alam-denenër-gägek-rangahsën hir gägek og nebë ram sën netum loq nyëg malakenu, benedo rot benyëg neheng raq lob Betuheng Majelëë kedi netum loq ham ayomin lo. ²⁰⁻²¹Rëk mu ham jak sënë ni namugin rë nabë wirek og Anutu yi gägek su verup mehöti avi yoh vu yö kwa rë. Gaq Anon Vabuung yö neggee vu sir bedenener Anutu yi gägek yam rangah. Nebë sënë om hil su ayoh vu bë tatekin gägek sën neggëp loq Anutu-yi-qiya lo ti degwa jegin jegin noh vu hil ngo kwad rë, gaq Anon Vabuung doq vu hil og mëm.

Alam-gägek-kuungsën Hir Ngaa Nipaya

2 ¹Wirek og alam-gägek-kuungsën deverup loq alam Israel, om yik tatovaha-gägek-kuungsën-yi rëk deberup doq ham geving nabë saga.

Rëk debun sir gedenanër gägek kuungsën aggagga in debasap alam, geyö rëk degeruu demij vu Mehöböp sën baço sir yom lo geving. Rëk degevonḡ nabë sënë, rëk mu rëk malaj nama pevis avuti. ²Nebë saga rëk mu alam ngahisekë rëk desepa doḡ alam saga hir nḡaa nipaya aggagga, lob tum rëk degevonḡ balam jeggjin jeggjin la denanër gägek nipaya jak aggata-gägek-anon-yi. ³Alam sagi malaj anöo veröḡ yi, om rëk denanër gägek kuungsën ngahisekë in degeḡo ham hömin monë lu nḡaa nah vu sir. Rëk mu Anutu yö ro buk sën genḡo hir gägek lo wirek meneggëp vorot bë rëk malaj nama. Lob nḡaa sën basap sir lo, og su ggëp yiing rë, gaḡ yö medo neḡin.

⁴Log yik angër la devonḡ nḡaa nipaya wirek, rëk Anutu su nelë sir mu rë. Gaḡ duu sir loḡ ya karabus ggëp Nyëḡ Nipaya loḡ waak malakenu. Lob nahën denedo loḡ rot medeneḡin buk-nyëvewen-yi.

⁵Log yik alam sën denedo wirek lo, og yik nebë saga ving. Su kwa pesivin sir rë. gaḡ vonḡ mebël vuuk böpata merehöo sir vahi sën deruu demij vu Anutu lo bemalaj maya. Gaḡ yik Noa timu sën nenër gägek yohvu yam rangah lo, om Anutu ḡin yi, geḡin yi alam nemadvahi-bevidek-luu medenedo nivesa ving.

⁶Log vo nyëvewen vu alam Sodom los Gomora ving nebë saga. Anutu vesi begganḡ bu böp luu sënë raḡ nengwah megga sir bemalaj maya veröḡ yi. Gevewev meris mu nedo. Nebë saga in bë nabë alam degeruu demij vu Anutu, og kwaj bo nah gägek wirek hen sagi, lob dejak ni nabë rëk denatöḡ vu nyëvewen nabë sënë. ⁷Gaḡ Lot og yi mehö yohvu, om Anutu ḡo yi vër in Sodom los Gomora, benedo nivesa gesu mala ma rë. In Lot ayo maggin böpata in alam nij paya hir baggëb lu nḡaa sën denevonḡ lo. ⁸Yönon, mehö niröp sënë nedo ving sir beyö nelë hir nḡaa nipaya los nengö hir gägek nipaya yoh vu buk pin. Yi og ayo yö neggëp niröp, om ayo maggin rot in hir nḡaa nipaya sën denevonḡ medenekeyëh horek lo. ⁹Yönon, Mehöböp neḡo alam sën denesepa loḡ yi lo vër in nḡaa nipaya sën neseggi sir lo, genetunḡ alam nij paya medenedo rot in na berup doḡ buk sën genḡo hir gägek gebo nyëvewen doḡ nah vu sir lo.

¹⁰Lob alam-gägek-kuungsën lo saga vahi rëk degeḡo nipaya nyëvewen böpata rot kesuu. Sir sën ahëj neving nḡaa-ningöhek-baggëb-yi mu medenesepa loḡ, gekwaj nevo Mehöböp aye bë nḡaa meris lo. Alam nebë sënë denëḡo sir raḡ bedenesepa loḡ yö kwaj mu. Om sën su deneggöneng rë, gedenenër pelë raḡ angër yaḡek yi. ¹¹Angër lo dekesuu alam gägek kuungsën sënë, genij wëek böpata rot kesuu sir ving. Rëk mu su denenër pelë raḡ sir rë, gesu denenër sir rangah vu Mehöböp rë. ¹²Gaḡ alam gägek kuungsën sënë, og denenër pelë raḡ nḡaa sën su deraḡ ni rë lo. Sir nebë reggu sën kwaj masën lo, om sën kwaj neya vu navij medenesepa loḡ nḡaa-navij-yi mu. In ataj ḡo sir in bë mehönön denajom sir ahon bedengis sir medenadiik. Om yik nḡaa nipaya sën denesepa loḡ lo rëḡ

gevonḡ bemalaj nama na verōk yi. ¹³Rēk degeko nyēvewen nipaya dok nah hir nḡaa nipaya. In su ahēj neving rot bē dega nos bōp los denanum bēl niwēek pangśen buk mu rē, gaḡ denevonḡ rangah atov ving. Log deneloḡ ya ving ham beham los newa nos-ahēvingsēn-yi loḡ ti. Rēk mu denetetuhin ham gekwaj vesa in nḡaa nipaya sēn denevonḡ vu ham agi, om sir nebē nḡaa ningōhek genḡaa nipaya loḡ len. ¹⁴Malaj anon medenelē avēh yoh vu buk in bē degodeḡ sir. Lob malaj su yoh vu bē rēk gevuu nḡaa nipaya rē, gaḡ ma verōk yi. Alam sēnē denepelēpin alam sēn su ayoj niwēek rē lo, bedenedadii sir ya in bē degevonḡ nḡaa nipaya geving sir. Ayoj yō tahu sir loḡ aggata sēn ayoj nevu nevu in mehō ngwē hir nḡaa lo, om Anutu rēk kevoh alam sēnē na verōk yi. ¹⁵Alam-ḡaḡek-kuungsēn lo sēnē deruu demij vu aggata nivesa, om sēn deneketul loḡ medeneya jeggin jeggin, beya denesepa loḡ Beyor nalu Balaam sēn ahē neving monē pangśen rot beneḡo raḡ terotsēn lo vaha. ¹⁶Dogi su denevengwēng rē, rēk mehō-nenēr-ḡaḡek-rangahsēn Balaam yi dogi vengwēng nebē mehōnon benēr Balaam yi nḡaa nipaya sēn nevonḡ agi rangah. Lob ggērin nḡaa kwamasēn sēn bē gevonḡ lo.

¹⁷Log alam-ḡaḡek-kuungsēn nebē sēnē, og sir nebē bēl veyē sēn netewii ya lo. Gesir nebē beggob sēn sang neḡo meneya jeggin jeggin lo. Om Anutu ggooin nyēḡ mala vahis verōk yi raḡ vu sir in bē demedo dok. ¹⁸Sir sēnē denevengwēng avij bōp medeneḡo sir raḡ in ḡaḡek meris meris sēn anon ma lo. Lob denevo bēl loḡ alam sēn nahēn denevuu nḡaa-alam dahis-yi ya lo, lob tum newaj neraḡ in baggēb los navij yi nḡaa nipaya aggagga beyah denesepa loḡ sir. ¹⁹Alam ḡaḡek kuungsēn sēnē denenēr vu sir bē rēk degeko sir vēr in horek pin besu deginengin sir rē. Rēk mu sir yō nahēn denedo los nḡaa nipaya sēn neduu sir lo. In degwa nebē sēnē bē nḡaa sēn kesuu mehōti lo, og mehō saga neggurek babu benesepa loḡ rot. ²⁰Yōnon, deraḡ hil Mehōbōp Yesu Kerisi sēn ḡo hil yom lo ni, lob deveya in nḡaa ningōhek nipaya sēn neggēp dob agi bedeyom. Rēk mu nabē degērin sir nah bedega jaḡ nḡaa nipaya sēnē gökin menaduu sir ahon, og rēk demedo paya na verōk yi kesuu muḡinsēn. ²¹In deraḡ aggata sagi ni bedeko horek vabuung sēnē ggovek ya, loḡ yom deruu demij vu. Gaḡ bē yō demedo duḡ in nḡaa nirōp sēnē yi aggata, og sagraḡ nivesa vu sir. ²²In devonḡ balam hib wirek hir ḡaḡek los kwa ti sēnē anon raḡ raḡ sir nebē, “Anōo yah negga nyē muteksēn ggōkin.” Log ḡaḡek ngwē neggēp ving bē, “Bōok ripek loḡ bēl ggovek, loḡ tum yah sis madōp ggōkin.”

Mehōbōp Rēk Nom Yōnon Rot

3 ¹Sa mehō lo-e! Sa ḡevu ḡapiya ngwē sēnē netu luu vu ham. Loḡ ḡapiya luu sēnē og sa ḡevu ḡaḡek in bē bēr ham kwamin in ḡaḡek vahi gökin beham jaḡ ni nivesa. ²Log ham kwamin bo nah ḡaḡek sēn Anutu-yi-alam-vabuung denenēr rangah wirek bē rēk anon jaḡ lo. Geham

kwamin bo Mehöböp sën ʒo hil yom lo yi horek sën ham sinarë lo denër vu ham lo geving.

³Ham jak sënë ni namuḡin nabë Buk-tamusën dus jak, og alam sën denenër pelësën lo rëk deberup bedegevonḡ noh vu kwaj nipaya medenanër pelë nabë, ⁴“Nër bë rëk nom gökin-a? Lob maḡ yom benedo tena? Su yom rë! Alam hib wirek dediik ya, geyam beyam verup gwëbeng sënë, rëk mu nḡaa pin yö neggëp loḡ ben nebë sën wirek Anutu tung lo.” ⁵Alam pelësën sënë nij nelël bë su kwaj sero medejak nḡaa sënë ni nabë: Vu muḡinsën og Anutu nër, lob yaḡek anon raḡ. Log nër, lob dob ggooin yi raḡ in loo benedo loḡ loo vuheng atov. ⁶Lob dob nedo rot, loḡ mëm Anutu nër, lom mëm bël vuuk meggërin dob bekevoh nḡaa pin ya.

⁷Lob Anutu nër ving bë yaḡek los dob sën denedo gwëbeng agi, og nengwah rëk ga. Rëk mu gëp degeḡin buk sën Anutu nom mebo nyëvewen doḡ nah vu alam sën deneruu demij vu yi lo bemaalaj nama rë. ⁸Rëk mu sa mehö lo-e, ham su kwamin birek in nḡaa timu sënë: Mehöböp su nelë buk timu nebë dus genḡebek 1,000 nebë ading rot rë, gaḡ nelë luho bë luho neggëp ti. ⁹Mehöböp su nesis buk raḡ raḡ in nḡaa sën nenër menevenuh ya vorot lo nebë mehönon vahi sën kwaj nevo bë denanër ḡaḡek medengis jak jak lo rë. Gaḡ ahë neving bë alam pin degërin sir in mehöti su mala nama, om sën nahën nejom yi ahon geneḡin ham.

Dob Los Yaḡek Sënë Rëk Malaj Nama Na

¹⁰Rëk mu buk sën Mehöböp nom lo, og rëk nam nabë sën alam hodeḡ deneyam. Doḡ buk sagi, og yaḡek rëk tetap böpata log mala nama na. Log nḡaa mahen mahen pin sën nedo loḡ lo, og rëk niḡerus jak bedëtek, log nengwah ga megovek na. Log nengwah rëk ga dob los nḡaa pin sën mehönon desemu menedo loḡ lo geving. ¹¹Nḡaa pin sënë rëk nama na nabë sënë. Om ham pasang gwëvonḡ nḡaa niröp mu, begweḡin ham gesepa doḡ Anutu yi aggata noh vu buk pin. ¹²Geham medo gweḡin Anutu yi buk sën yaḡek rëk natum doḡ benama na, log nḡaa mahen mahen pin niḡerus jak bedëtek benengwah ga begovek na lo. Lob ham gwetunḡ malamin geham bo kwamin in buk sënë in lob natöḡ nam pevis. ¹³In hil neheḡin yaḡek los dob mewis sën Anutu nër bë rëk getunḡ bengaa niröp mu yö gëp doḡ lo.

Hil Malad Sepa Megeḡin Mehöböp

¹⁴Sa mehö lo-e, yiḡ ham neḡin nḡaa sënë, om ham nimin wëëk begweḡin ham nivesa in vu tamusën og nḡaa nipaya ti, ma ḡaḡek ti, su gëp vu ham. Gaḡ ham los Anutu medo los ḡaḡek ahë yes. ¹⁵Rëk ham kwamin bo sën Mehöböp nejom yi ahon benahubin hil lo nabë: Sënë tateḡin aggata in bë hil aḡërin hil nah vu yi. Lob Mehöböp vo kwa nivesa

vu hil arid Paulus sën hil ahöd neving yi lo, bekevu gägek yik nebë sënë yök vu ham ving. ¹⁶Kë'! Log loḵ yi ḵapiya pin sën lo, og kevu gägek raḵ nḡaa sënë ving. Rëḵ mu gägek sën neggëp loḵ yi ḵapiya agi lo la, og su degwaj neggëp rangah rë, om hil nehevong huk böp in bë natök vu degwa. Lob alam duḡ duḡ los alam sën nij wëëk ma lo vahi, og deneyoh paya medeneḵo degwa yööhu verup raḵ yi gägek sënë, geraḵ gägek sën neggëp loḵ Anutu-yi-ḵapiya vahi lo ving. Om sënë rëḵ gevong bemalaj nama.

¹⁷Sa mehö lo-e, ham raḵ ni muḡin bë alam nebë sënë rëḵ deberup, om ham nḡo gweḡin ham nivesa rot. In alam sën su denebë nengaj vu horek rë lo rëḵ detetuhin ham mededadii ham nah, lob ham su rëḵ bare nimin wëëk rë geham rëḵ bës. ¹⁸Gaḵ ham raḵ hil Mehöböp Yesu Kerisi sën neḵo hil yom lo ni beham ḵo yi semusemu nyëmasën. Nebë saga, om ham pasang gweḵo semusemu vu yi los gweḵo kwamin vu yi noh vu buk, in ham jaḵ ni rot. Hil ḡaḵo arë jaḵ na vavunë rot gwëbeng sënë gerëḵ gëp degwata los degwata nabë saga. Yönon!